

**Soraarnerussutisiaqalernissamut aningaasaatit ilaannit pissarsiat
akileraaruserneqartarnerat pillugu Inatsisartut inatsisaata allanngortinneqarnera
pillugu Inatsisartut inatsisissaattut siunnersuut**
Aningaasaqarnermut Naalakkersuisumit saqqummiunneqartoq

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerreqarneranut

ISUMALIUTISSIISUTAA

Ataatsimiititaliap suliarinninnermini ilaasortarai:

Inatsisartunut ilaasortaq Hermann Berthelsen, Siumut, siulittaasoq
Inatsisartunut ilaasortaq Sara Olsvig, Inuit Ataqtigiit, siulittaasup tullia
Inatsisartunut ilaasortaq Karl Kristian Kruse, Siumut
Inatsisartunut ilaasortaq Jess Svane, Siumut
Inatsisartunut ilaasortaq Niels Thomsen, Demokraatit
Inatsisartunut ilaasortaq Aqqaluaq B. Egede, Inuit Ataqtigiit
Inatsisartunut ilaasortaq Tillie Martinussen, Suleqatigiissitsisut

Siunnersuutip imarisaa siunertaalu

2017-imi ukiakkut Inatsisartut ataatsimiinneranni soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisaat aamma pigisanit pissarsiat ilaasa akileraaruserneqartarnerat pillugu Inatsisartut inatsisaat akuersissutigineqarput (UKA 2017/88 aamma 89).

Inatsisartut inatsisaasa imaraat soraarnerussutisiaqalernissamut ileqqaakkanit iluanaarutit amerlanerpaartaatigut 15,3 procentinik akileraaruserneqartassasut. Soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisaanni ilaapput soraarnerussutisiaqalernissamut aningaasaateqarfiit Kalaallit Nunaanniittut, pigisanilli pissarsiat ilaasa akileraaruserneqartarnerat pillugu Inatsisartut inatsisaanni ilaallutik soraarnerussutisiaqalernissamut aningaasaateqarfinni nunani allaniittuni soraarnerussutisiaqalernissamut ileqqaakkat ilaat il.il. kiisalu Kalaallit Nunaanni aningaaserivinni soraarnerussutisiaqalernissaq siunertaralugu ileqqaakkat.

2017-imi ukiakkut ataatsimiinnermi Inatsisartut inatsisaasa taakku marluk akuersissutigineqarnissaat sioqqutillaarlugu, aningaaseriviup siunissami IT-kkut inerisaasariaqarnissaanut annertuumik aningaasartuuteqarnerusoqarnissaa eqqarsaatigalugu, aningaaseriviit soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisaannut ilanngunnagit pigisanit pissarsiat ilaasa akileraaruserneqartarnerat pillugu Inatsisartut inatsisaannut ilanngunneqarnissaannik qinnuiginnisummik imaqartumik Naalakkersuisut Grønlandsbankenimit saaffiginnisummik tigusaqarput.

Grønlandsbanken ilisimatinneqarpoq piffissap sivikippallaarnera pissutigalugu Inatsisartut inatsisaannut taakkununga marlunnut naleqquttumik allannguutissatut siunnersuuteqarnissaq pisinnaanngitsoq, soorluttaaq 2018-imut aningaasanut inatsit eqqarsaatigalugu siunnersuutit 2018-imi upernaakkut ataatsimiinnissamut kinguartinneqarsinnaanngitsut. Grønlandsbankenip kissaatai eqqortinniarlugit 2018-imi upernaakkut ataatsimiinnermut siunnersuummik suliaqartoqassasoq taarsiullugu neriorsuutigineqarpoq. Inatsisartunut qinersisoqarnera pissutigalugu Inatsisartut upernaakkut 2018-imi ataatsimiinnissaat taamaatinneqarmat siunnersuut matumani pineqartoq Inatsisartut ukiakkut 2018-imi ataatsimiinnissaanni saqqummiunneqarpoq.

Siunnersuutip Inatsisartunit siullermeerneqarnera

Siullermeerinninnermi siunnersuut tapersorsorluarneqarpoq. Tusarniaasimaneq ataasiakkaanit uparuarneqarpoq, tamannali inatsisissatut siunnersuutaaqqaartut 2017-imi ukiakkut akuerineqartut oqaluuserineqarnerannut tunnganerusorinarpoq (UKA 2017/88 aamma 89).

Tusarniaaneq

Siunnersuut aammalu pigisanit pissarsiat ilaasa akileraaruserneqartarnerat pillugu Inatsisartut inatsisaata allanngortinneqarneranik Inatsisartut inatsisissaattut siunnersuut (UKA 2018/196) piffissami 2018-imi 17. majimiit 15. juunimut tusarniaassutigineqartoq Naalakkersuisut siunnersuummut nassuiaatini paasissutissiissutigaa. Tusarniaanermut akissutit assilineqarnerannik ataatsimiititaliaq pissarsivoq.

Tusarniaaneq pillugu ataatsimiititaliaq allanik oqaaseqaatissaqanngilaq.

Ataatsimiititaliap siunnersuummik suliarinninnera

Siunnersuut ulloq 1. juli 2018-imi atuutilissasoq aammalu ukiumut isertitaqarfiusumut 2018-imut tamarmut atuutissasoq ataatsimiititaliamit maluginiarneqarpoq.

Akuusunut tamanut, tassunga ilanngullugu innuttaasunut soraarnerussutisiaqalernissaq

siunertaralugu ileqqaagaqartunut, ileqqaakkanit pissarsiat akileraarusersorneqarnerisa isumaginissaanut tunngaviusunik, IT-kkut programminik pioreersunik atuinissap ajornannginnerullunilu akikinnerunissaa Naalakkersuisut tamatumunnga tunngavilersuutigaat. Kiisalu pigisanit pissarsiat ilaasa akileraaruserneqartarnerat pillugu Inatsisartut inatsisaanni malittarisassat imaluunniit soraarnerussutisiaqalernissamut aningaasaatit ilaannit pissarsiat akileraarusersorneqartarnerat pillugu Inatsisartut inatsisaanni malittarisassat malillugit akileraarut naatsorsorneqarpat, innuttaasunut assigiinngissuteqartussaanninnera imaluunniit annikitsuinnarmik assigiinngissuteqarnissaa naatsorsuinerit takutimmassuk isiginiarneqarpoq. Kiisalu nassuiaatini naatsorsuinerit takutippaat assigiinngissutsit annikitsut taakku inuiaqatigiinnut iluaqutissiissasut. Tamanna ataatsimiititaliamit tusaatissatut tiguneqarpoq.

Siunnersuutip aningaasaqarnikkut kingunerisassai

Siunnersuutip piviusunngortinneqarnerani aningaasatigut kingunerisassat siunnersuummut nalinginnaasumik nassuiaatini nassuarneqarput. Inatsisartut inatsisaata atuuffiata annikillinerata Inatsisartut inatsisaannik iluanaarutit ukiumi siullermi 1-4 mio. kr.-inut taggineqartunik annikillisissavai. Appariarneq soraarnerussutisiaqalernissamut aningaasaatit ilaannit pissarsiat akileraarusersorneqartarnerat pillugu Inatsisartut inatsisaannik iluanaarutit qaffannerisigut naligiisinneqassaaq. Ataatsimut isigalugu allannguutit taakku iluanaarutitut sunnuteqanngingajassasut naatsorsuutigineqarpoq.

Allannguut akileraartarnermut ingerlatsivimmumt allaffissornikkut oqilisaataassaaq, tassami aningaaseriviit allaffissornikkut akiliisitsiniartarnerinillu suliasat annertuut tigussammattigik. Ukiumut inuup ataatsip piffissami tamakkiisumi sulineranik sipaaruteqartoqassasoq missingerneqarpoq.

IT-mik aaqqissuussinernik ineriartortitsinermumt, ingerlatsinermumt aserfallatsaaliinermullu atatillugu siunnersuut aningaaserivinnumt annertuumik sipaaruteqaataassasoq nalilerneqarpoq. Sipaarutit millioninik amerlanerussasut aningaaserivinnit missingerneqarpoq.

Bank Nordikip kiisalu GrønlandsBankenip naatsorsuinerisa takutippaat pigisanit pissarsiat ilaasa akileraarusersorneqartarnerat pillugu Inatsisartut inatsisaat naapertorlugu imaluunniit soraarnerussutisiaqalernissamut aningaasaatit ilaannit pissarsiat akileraarusersorneqartarnerat pillugu Inatsisartut inatsisaat naapertorlugu akileraarutip naatsorsorneqartarnerani assigiinngissuteqanngitsoq imaluunniit annikitsuaraannarmik assigiinngissuteqartoq. Inatsimmi siullermi imaluunniit aappaani akileraarutitut naatsorsueriaatsit allassimasut aallaavigalugit akileraarutissanik naatsorsuinerini soraarnerussutisiaqarnissamut ileqqaagaqartunut ataasiakkaanut pitsaanngitsumik sunnuteqarnaviannngitsoq aningaaserivinnit nalilerneqarpoq.

Siunnersuutip innuttaasut allaffissornikkut oqilisaaffigineqarnerannik nassataqassaaq, akileraarutinimmi nalunaarutiginninnissat akiliinissallu innuttaasut nammineerlutik isumagissanngimmatigit.

Ataatsimiititaliap inassuteqaatai

Ataatsimiititaliap isumaqatigiittup inassutigaa siunnersuut akuerineqassasoq.

Taama oqaaseqarluni isumaliutissiisummilu allassimasutut paasinnilluni ataatsimiitaliap siunnersuut aappassaaniigassanngortippaa.



Herman Berthelsen
Siulittaasoq




Sara Olsvig
Siulittaasup tullia



Jess Svane



Aqqaluaq B. Egede



Karl Kristian Kruse



Niels Thomsen



Tillie Martinussen